

Saturday, July 11, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

PHE

Public Health Engineering (PHE) Department hotute chuan fur ruah tui tam zelah tui lian leh tui nu avangin nidang angin tui an pump tam theih loh thu an sawi.

Akashvani News in a kawmnaah he thu hi sawiin PHE hotute chuan mipui hnena sem tur tui chu an pump reng tho a, amaherawhchu tui a nut nasat avangin phase 1, 2 leh 3-ah te tui pump a khaihlak ve hret thin an ti a. Mipui mamawh tawh tur chu awm thoa an hriat thu sawiin hetihruah hian tui pump nidang aia a tlem chhoh deuh avangin mipuia semchhuahah pawh khaihlak tlem azawng chu a awm lo thei lo tih an sawi a ni.

PHE hotute chuan mipuite chu thal lai anga mangang lutuka an awm an hriat loh thu sawiin fur khua te a nih avangin mi tam takin ruah tui khawl nachang te an hre tawh tih an sawi a. Ruah tui khawl chu department in an ngaihpawimawh thu sawiin ruah tui khawl tura inzirtirna chu kawng hrang hranga an kalpui reng thil a nih thu an sawi a. Mipuite chu ngaipawimawh tura an duh thu an sawi bawh a ni.



TAXI APP

Mizorama taxi hrang hrang hruaitute chuan MizoTaxi app hman meka an duh loh thil te sawipui turin Chief Minister hmuh an tum a, an la nghah mek thu an sawi.

Vawiina Akashvani News in a kawmnaah Mizoram Taxi Association President Pu K. Lalrinliana chuan lirthei hmanga eizawng taxi pawl pathum hruaitute chuan Chief Minister hmu turin appointment an dil a, an duh anga rangin an la hmu thei lova, an hmuh veleh Chief Minister chu an harsatna sawipui an tum dawn a ti a.

Pu K. Lalrinliana chuan Chief Minister hnenah hian MizoTaxi App a hman tur rate ennawn chungchang te, a app chhunga belhchian dawl lo leh siamthat ngai nia an hriat bakah an harsatna hrang hrang thlen an tum thu a sawi a. High Court-a khin a tum chu Chief Minister hmuh phawta, chuta an inbiakna azirin hma lak zel an tum thu a sawi bawh a ni.

Puan tawh angin MizoTaxi app hmangtu taxi te hi nimin atang khan thla thar ni 10 thleng tlanloh ni nei lovin an tlan tan a. Department atanga thudawn danin MizoTaxi App-a in ziaklut hi 849 an awm tawh a, inziaklut te hi lirthei ke li nei taxi 231, ke hnih nei taxi 603 leh autorickshaw 15 a ni.



3 MINISTERS VISITS HORTICULTURE CENTRE

Vawiin khan Minister pathum - Horticulture Minister Pu C. Lalsawivunga, Revenue Minister Pu B. Lalehhanzova, leh Tourism Minister Pu Lalnghinglova te chuan sorkar hnathawh mek enfiahin Horticulture Centre, Chite Veng an tlawh.

Mizoram Sawrkar chuan kum 2023 atang khan Project pahnih, ‘Development of Pilgrimage & Heritage Tourism Facilitation and Congregation Centre’ leh ‘Aizawl Convention Centre’ te chu Horticulture Centre, Chite hmunah bul an lo tan tawh a. Heng Project te avang hian helai hmuna Horticulture Department hmalakna hrang hrang chu tihtawp a ni a.

Tun dinhmunah heng hmalakna hnuaia Building te hi hman theih tura sak zawh tep a ni tawh a. Inkalpawhna kawng tur a awm loh avangin Horticulture Minister, Revenue Minister leh Tourism Minister te hian a hmunah tlawhin, a kalkawng tur te siamfel dan tur an en a. Heng building te hi mipuiten tangkai taka an hman thuai theih nan hmalak dan tur te leh kawng sial dan tur te an en ho a ni.

Minister te hi an Department chan theuha Officer te, Chite veng khawtlang hruaitute leh ZPM Aizawl West-II hruaituten an tawiawm a ni.



WORLD POPULATION DAY

Vawiin hi World Population Day a ni a, khawvela mihring pung zel avanga harsatna hrang hrang thleng thei te sutkian dan tur ngaihtuah thin a ni a, hmanrei theih, daihrei leh daihzai zawnga khawsak dan te ngaihtuah chhoh zel a ni.

Kum 1990 December thla khan United Nations General Assembly chuan resolution siamin, khawvela mihring pung chho zelin a hrin, harsatna hrang hrang leh chona danglam tak a siam te sukiang tura hma la turin a pawm a ni.

Kumin World Population Day thupui atan hian- Realising the hopes and aspirations of young people – today and for the future tih hman a ni.

